

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 1647 del 13/06/2025

En Palai en Bersntol an zòmmtrèff envire trong van TSM-STEP Schual ver en Lòntregiar ont ver de Lòntschòft

Lòntumpau ont alpine lòntschòft

[Mòcheno] Ver zboa to, as de draizena ont as de viarzena van prochet, en Palai en Bersntol, bart men drautschbinnen asn derhòltn de pèrgheff ont as de lòntumpau ver za mòchen bider lem de alpine lòntschòft, bail an trèff organisart van TSM-STEP Schual ver en Lòntregiar ont ver de Lòntschòft, zòmm pet en Bersntoler Kulturinstitut. Der zòmmtrèff, bou as toalnemmen de learer, de auskennetn lait ont de derstelltn va de gamoa'schòft, mòcht toal va de òrbetn u'gaheift en 2023, va derklörung, va suach ont u'lear as de lòntumpau, iberhaup asn prauch van stoa' ont van holz ont en bider paun ont ausrichtn de heff as sai' en Bersntol. S ist an projekt as mòcht toal van programm PNRR "De kròft va de minderhait: mòchen bider lem s taitches dorf en sud van Alpn".

As de draizena van prochet bart u'heiven der trèff der Giovanni Gardelli, iberòll viarer van Dipartiment urbanistik, strom, kataster, gruntisch ont lòntzòmmhòlt va de Autonome Provinz va Trea't ont van Gianluca Cepollaro, vourstea'ner van TSM-STEP Schual ver za regiarn en ourt ont de aussicht, asn tema "Vernaieren de lòntschòft ont biderlem va de gamoa'schòft". S bart envire gea' pet en technische trèff "Architektur ont vernaieren de alpineplatz" pet en vourstell va mearer praich ver za biderherstelln ont auspaun pet architekturn as mòchen toal van praich van Alpn.

En sòmsta as de viarzena van prochet barts kemmen òcht gem en "sistem Hoff" ont iberhaup en de sozial, kulturaln ont birtschòft ont as gem nutztn aspektn. En zòmsta en de vria bartn toalnemmen der provinzal assessor en de urbanistik, strom, verkear, sport ont schutzplatz Mattia Gottardi ont der president van TSM Francesco Barone. En nomitto van sòmsta, kan Filzerhof, ist en programm de innbaich va de ausstell "SGUARDI/PLICK De heff van Bersntol". A gschicht va bersntoler architektur, an rif no jorhundert va zòmmlem zbischn s mentsch ont de natur.

En de zboa link do unt n der programm van zboa ta ont de mogleichkaitn ver za schraim se inn:

As de 13 van prochet um 10.00 en de vria kan Gamoa'sol en Palai en Bernstol:

<https://www.tsm.tn.it/attivita/edilizia-rurale-tradizionale-e-rigenerazione-del-paesaggio-alpino/>

As de 14 van prochet um 10.00 en de vria kan Gamoa'sol ont nomitto van Filzerhof:
<https://www.tsm.tn.it/attivita/il-sistema-maso-comunita-e-cultura/>

Derzua de plakatn van zboa ta.

Ibersetz gamòcht van Sprochtirl va de Tolgamoas'chòft Hoa Valzegu' ont Bersntol

(cdt)